

Յունիս 21-ին. նորից պահանջ, որ Ազրբեջանը զորք ուղարկէ դէպի Հայաստանի սահմանները. «Մեր զորքերի երեւոյլը սահմանների վրա խուճապ կը ձգէ հայերի մէջ, կուժեղացնէ դասալքութիւնը և կը բարձրացնէ մահմետականների ոգին... Եթէ ուզում էք օգուտել ըստէից, ձեռք առէք շտապ և վճռական միջոցներ»: Ու կրկին. «Սպասում են խոշոր դէպքեր: Հայաստանը լարում է իր բոլոր ուժերը»:

Եւ, իրօք, Հայաստանը լարում էր իր բոլոր ուժերը: Մահմետական-նութիւնը ոտքի էր ելել հայ ժողովրդի ու Հայաստանի գոյութեան դէմ: Յունիս 14-ին, Փարիզի վեհաժողովը օսմանեան պատերազմութեան յանձնել էր հաշտութեան պայմանները, յոյները դրաւել էին Իդմիրը, մէջտեղը դրած էր Մեծ Յունաստանի ու ծովից-ծով Հայաստանի ծրագիրը: Եւ մահմետական աշխարհը յուզւում էր դայրացած: Սկսում էր քէմալական շարժումը, որի ազդեցութեան տակ Կովկասի մահմետականները համախօսականներով ու հեռագրներով ուժակոծում էին Հաշտութեան Վեհաժողովն ու դաշնակիցների անդրկովկասեան ներկայացուցիչներին՝ բողոքելով Հայաստանի տիրապետութեան դէմ և պահանջելով իրենց կցումը Թիւրքիային կամ Ազրբեջանին:

Միւս կողմից, յունիս ամսից սկսած, հայկական հետախուզութիւնը նկատում էր Թիւրքերի կողմից զինուորական շտապ պատրաստութիւններ Հայաստանի ուղղութեամբ: «Թիւրքահայաստան ուղարկւած գործակալները, կարդում ենք Հայաստանի Գլխաւոր Սպայակոյտի յունիս 17 դադանի դեկուցման մէջ, վկայում են Թիւրք կանոնաւոր զօրամասերի ներկայութիւնը Օլթիի և Սարըղամիշի ուղղութեամբ և Ալաշկերտի շրջանում: Կատարելապէս ստոյգ կերպով հաստատւած է, որ Թիւրքական 12-րդ դիվիզիան գտնւում է Սորոսան-Ձիւինում՝ կենտրոնն ունենալով Սորոսանում... Քարոզչութիւնը Թիւրքիայի և Անգլիոյ վասի շրջաններում ուժեղանում է: Այդ նպատակով մեծ քանակութեամբ Թիւրք գործակալներ են ուղարկւած Հայաստանի ներսերը, մահմետական գիւղերը, և ամէն տեղ յայտնաբերւում են մեր վարչութեան և հակահետախուզութեան կողմից: Մասնաւորապէս զօրաւոր է Թիւրք գործակալների ազդեցութիւնը Արդահան—Օլթիի և Բարդուսի շրջաններում, ուր նրանք կազմակերպել են գնդացիներով զինւած քրդական հրոսախմբեր: Նոյն պատրաստութիւնը կատարւում է և՛ Սարըղամիշ—Կաղզւան տարածութեան վրա և աւելի հեռուները՝ Բարթոլեան լեռնաշղթայի քրդաբնակ մասերում մինչև Արարատ»:

Նախապատրաստելով ներսից ու դրսից՝ Թիւրք-ազրբեջանցիները անցան գործի, որը հեշտանում էր և նրանով, որ անգլիացիք պաշտօնապէս յայտարարել էին, թէ չուտով հեռանալու են Կովկասից. մինչև մայիս 15 Կարսում և մայիս 30 Նախիջևանում արդէն ոչ մի անգլիական զինուոր չէր մնացել: Հայերը մնացել էին միայն իրենց համեստ ուժերով: Այդ օրերին Հայաստանը ունէր երեք հետևակ բրիգադ՝ իւրաքանչիւրը երկու գնդից և դուռը՝ երեք դումարտակից, երկու ձիաւոր դուռը՝ իւրաքանչիւրը վեց հարիւրեակով, 12 մարտկոց՝ ամէն մէկը 4 թնդանօթով, 3 զրահապատ գնացք և մի քանի տեղական զօրամասեր: Այս ուժերը ցրւած էին երկրի բոլոր կողմերում, ունէին թերի կազմ, չնչին քանակութեամբ ռազմամթերք, վատ հագուստ ու պարենաւորում: